



BOLETÍN RSU XUÑO 2020

UNIVERSIDADE DE VIGO.

UNIDADE DE ANÁLISIS E PROGRAMAS



Jaime cabeza autor do libro.

JAIME CABEZA PUBLICA UN LIBRO NO QUE ESTABLECE OS LÍMITES ENTRE O QUE É TRABALLO SUBORDINADO E AUTÓNOMO

D. BESADÍO DUVI 01/06/2020

O catedrático de Dereito do Traballo e da Seguridade Social Jaime Cabeza acaba de sacar ao mercado un novo libro, unha obra dirixida basicamente á comunidade académica, pero tamén de moita utilidade para todos aqueles profesionais en activo que teñan que defender a persoas que son traballadoras subordinadas, pero ás que as empresas lle discuten esta condición e as tratan como autónomas, o que supón, entre outros aspectos, ter a condición de empresa e estar suxeito ao Dereito da Competencia. [+info.](#)



A UNIVERSIDADE ABRE A CONVOCATORIA DE AXUDAS DESTINADAS A EVITAR O ABANDONO DOS ESTUDOS POR MOTIVOS ECONÓMICOS OU FAMILIARES

DUVI 01/06/2020

Co obxecto de atender as necesidades do alumnado matriculado na Universidade de Vigo que presenta circunstancias económicas ou familiares que lle impidan ou dificulten a continuidade dos seus estudos, a Vicerreitoría de Captación de Alumnado, Estudantes e Extensión Universitaria abre a convocatoria de [axudas ao estudo](#) para aqueles alumnos e alumnas matriculados en programas oficiais de grao, mestrado ou doutoramento no curso 2019/2020. [+info.](#)



UN BOSQUE DE 'ANIMAMUTANTES' TRANSFORMA UNHAS URXENCIAS PEDIÁTRICAS

DUVI PONTEVEDRA 02/06/2020

Transformar, a través dunha intervención artístico-pedagóxica, as urxencias pediátricas do Hospital Arquitecto Marcide de Ferrol para xerar nelas unha atmosfera máis amable para os nenos e nenas, pero tamén para contribuír a unha mellor organización dos espazos. Estes dous factores confluíron no proxecto que as investigadoras do grupo Remoss Begoña Paz, Cristina Varela e Itziar Ezquieta levaron a cabo xunto coa asociación socioeducativa e cultural Paspallás neste hospital. [+info.](#)



O investigador do Observatorio da Gobernanza Enrique Varela

ESPECIALISTAS E PROFESIONAIS INCIDEN NA “NECESIDADE DE PROFESIONALIZAR” A DIRECCIÓN PÚBLICA

DUVI PONTEVEDRA 03/06/2020

Pór de relevo a importancia de “abrir un debate sobre a necesidade de profesionalizar as estruturas directivas das administracións públicas españolas en todos os seus niveis”. Este é, como salienta o investigador da Área de Ciencia Política e da Administración da Universidade de Vigo Enrique Varela, un dos obxectivos de *Hacia una Dirección Pública Profesional. Transformando las instituciones desde el liderazgo público profesional*, unha publicación que reúne as achegas de 34 expertos. [+info.](#)




José Luis Chan e Juan Picos, no inicio desta xornada virtual

MEDIO RURAL, UVIGO E USC CONSENSÚAN CO SECTOR OS CONTIDOS DO FUTURO INVENTARIO FORESTAL GALEGO

DUVI PONTEVEDRA 04/06/2020

Representantes da Consellería do Medio Rural da Xunta de Galicia, da Escola de Enxeñaría Forestal da Universidade de Vigo e da Escola Politécnica Superior de Enxeñaría da Universidade de Santiago de Compostela mantiveron este xoves unha xuntanza, a través do Campus Remoto da institución viguesa, con diferentes membros do Consello Forestal de Galicia. O obxectivo desta “videoxornada de participación” era tratar de consensuar coas entidades que integran este órgano que contidos sería necesario incorporar ao futuro inventario forestal continuo de Galicia. [+info.](#)



Localización dos núcleos analizados na Conca Interior de Galicia, con diferenciación dos tres dominios principais

UN EQUIPO INTERNACIONAL INVESTIGA POR PRIMEIRA VEZ COMO AFECTARON OS CAMBIOS CLIMÁTICOS ABRUPTOS Á FAUNA BENTÓNICA DA CONCA INTERIOR DE GALICIA

D. BESADÍO DUVI 04/06/2020

En 2014 o investigador da Universidade de Vigo Anxo Mena publicou unha [tese de doutoramento](#) na que demostraba que os desprendementos masivos de icebergs no Atlántico norte, os coñecidos como Eventos de Heinrich, provocaron o maior cambio climático na oceanografía de Galicia. Ese estudo estaba centrado, sobre todo, en como afectaron eses cambios a microorganismo como o plancto, pero neses intres pouco ou nada se sabía sobre as transformacións que produciran na comunidade macrobentónica. [+info.](#)



Na iniciativa participan 42 emprendedores e nove mentores

15 PROXECTOS EMPRENDEDORES DA UVIGO CONTINUÁN O SEU DESENVOLVEMENTO NA PLATAFORMA BRIDGE FOR BILLIONS

DUVI 04/06/2020

A declaración da pandemia da COVID-19 trincou o desenvolvemento, entre outras moitas cousas, dos proxectos das e dos emprendedores xurdidos da comunidade universitaria. Co obxectivo de axudarlles a continuar desde a casa as súas ideas de negocio, a Área de Emprego e Emprendemento da Universidade de Vigo puxo a disposición deste colectivo a posibilidade de empregar a plataforma dixital de incubación [Bridge for Billions](#). [+info.](#)




Os días 5, 12 e 19 de xuño a través de Campus Remoto

UN CICLO DE CONFERENCIAS ANALIZARÁ OS AVANCES EN BIOTECNOLOXÍA DE ALIMENTOS VEXETAIS

DUVI 04/06/2020

A investigación en biotecnoloxía de alimentos estase a converter nunha das áreas con máis potencial na Universidade de Vigo, que conta con investigadores altamente citados como os profesores Maurizio Battino, investigador distinguido honorífico, e Jesús Simal-Gándara, catedrático de universidade. A eles súmanse novas incorporacións neste eido do coñecemento como Francesca Giampieri e Bruno Mezzetti. Todos eles daranse cita nas próximas semanas nun ciclo de conferencias virtuais titulado *Plant-Food Guarantee and Improvement*. [+info.](#)



Portada da publicación

A REVISTA 'REDAS' PUBLICA UN NOVO NÚMERO SOBRE DEREITO, AUGA E SOSTIBILIDADE

DUVI OURENSE 05/06/2020

O cuarto número de *Redas. Revista de Derecho, Agua y Sostenibilidad*, lanzada desde a Facultade de Dereito no marco do proxecto de especialización do campus de Ourense como Campus da Auga, xa está dispoñible na rede para a súa lectura. Nela, diferentes especialistas abordan cuestións de interese no eido dos recursos hídricos, como o poder adxudicador das comunidades de regantes a efectos da lei de contratos, a doutrina sobre anulación de plans xerais e a proposta de creación dunha nova entidade para xestionar o ciclo integral da auga. [+info.](#)



A profesora Emma Rodríguez é a coordinadora desta publicación.

UNHA PUBLICACIÓN AFONDA NA VULNERABILIDADE DO TRABALLADOR AUTÓNOMO NA ECONOMÍA DIXITAL

DUVI 05/06/2020

A dixitalización da economía e a proliferación das plataformas na rede ás que prestan servizos traballadores e traballadoras autónomos xerou un escenario laboral no que este tipo de profesionais atópanse “especialmente desprotexidos”, o que fai necesario dotalos dun “novo estatuto que lles garanta dereitos laborais básicos equivalentes aos dos traballadores por conta allea”. Esta é, como destaca a profesora Emma Rodríguez, unha das principais conclusións que poden extraerse da análise que máis de 20 expertos e expertas realizan do impacto da economía dixital sobre o traballo autónomo nun número monográfico da revista *Temas Laborales*. [+info.](#)



Nas últimas semanas puxéronse en marcha preto dunha ducia de actividades formativas nas que se matricularon máis de 700 persoas

OS DOCENTES DA UVIGO APÚNTANSE EN MASA A DIFERENTES CURSOS SOBRE DOCENCIA EN LIÑA

D. BESADÍO DUVI 09/06/2020

O persoal docente da Universidade de Vigo quere arrancar o próximo curso preparado para impartir as súas clases de xeito semipresencial ou, de darse o caso, totalmente virtual. Para acadalo está a participar de xeito masivo nos diferentes [cursos organizados para eles pola Área de Formación e Innovación Educativa](#), desde onde se puxeron en marcha preto dunha ducia de actividades formativas nas que se matricularon máis de 700 persoas, todas elas docentes e investigadores da propia universidade. [+info.](#)



O OBSERVATORIO DAS PERSOAS TITULADAS ESTUDA O IMPACTO DA COVID-19 NA SITUACIÓN LABORAL DO ANTIGO ALUMNADO

D. BESADÍO DUVI 11/06/2020

Coñecer o impacto laboral que a actual crise por COVID-19 está a ter nas persoas tituladas da UVigo de todas as titulacións, promocións e lugar de residencia. Este é o grande obxectivo co que o Observatorio de Persoas Tituladas puxo en marcha esta semana a realización dunha [enquisa a todos os exalumnos e alumnas da Universidade de Vigo](#). [+info.](#)



Gregorio Luís Agís, Yoya Blanco e Pedro Figueroa, co cartel do Pont-Up Store 2020

O PONT-UP STORE DESENVOLVERASE CUN “FORMATO HÍBRIDO” CON ACTIVIDADES PRESENCIAIS E VIRTUAIS

DUVI PONTEVEDRA 11/06/2020

A COVID-19 non impedirá que, o vindeiro mes de setembro, o Pont-Up Store, o encontro de emprendemento promovido pola Universidade de Vigo, a través do Campus Crea, celebre a súa sétima edición. Farao, como sinalou o presidente do seu comité organizador, o profesor da Facultade de Ciencias Sociais e da Comunicación Pedro Figueroa, cun “formato híbrido”, no que se combinarán as actividades presenciais e virtuais. [+info](#).



Imaxe do encontro virtual.

UNHA OLLADA DESDE A ECONOMÍA Á CRISE PROVOCADA POLA COVID-19

DUVI OURENSE 11/06/2020

Este mércores celebrouse o primeiro faladoiro virtual do Colexio de Economistas de Ourense, no que participaron Alberto Vaquero, profesor titular e secretario da Facultade de Ciencias Empresariais e Turismo do campus de Ourense; Rocío de Frutos, directora provincial do INSS de Ourense; Felipe Ferreiro, presidente de Cruz Vermella de Ourense; Miguel Ángel Vázquez, presidente do Consello Galego de Economistas, e María del Carmen Sampayo, decana-presidenta dos economistas ourensáns. [+info](#).



UN OBRADOIRO GRATUÍTO E EN LIÑA PARA FORMARSE NO ÁMBITO DO EMPRENDEMENTO COOPERATIVO

DUVI 11/06/2020

A unión de cooperativas EspazoCoop en colaboración coa agrupación estratéxica da Universidade de Vigo, Ecobas, ofertan un curso de carácter gratuíto para promover a formación no eido do cooperativismo. A actividade, que se enmarca dentro da programación da Rede Eusumo 2020, denomínase ‘Lánzate a emprender en cooperativa’ e será impartida de xeito telemático mediante a plataforma de teleformación da Unión de Cooperativas Espazocoop, dentro do campus virtual da Universidade de Vigo. [+info](#).



Alumnas que participaron en 2019 na exposición *Sen Moldes*, unha das das actividades financiadas con estas axudas

20.000 EUROS PARA PROMOVER A “MIRADA LILA” EN MÚLTIPLES ACTIVIDADES

D. BESADÍO DUVI 10/06/2020

A Unidade de Igualdade destinará este ano preto de 20.000 euros en axudas dirixidas a promover a “mirada lila”, tanto nas actividades docentes como en todas aquelas que contribúan á sensibilización en materia de xénero e a transmisión de valores igualitarios na Universidade de Vigo. Subvencionaranse en total 18 actividades que, debido ás actuais circunstancias sanitarias, se celebrarán maioritariamente en liña, organizadas por persoal docente e investigador dos tres campus. [+info](#).



A actividade no centro comezará o 1 de setembro

A ESCOLA INFANTIL DO CAMPUS ABRE O PRAZO PARA SOLICITAR UNHA DAS SÚAS 41 PRAZAS

DUVI OURENSE 12/06/2020

A Escola Infantil Concepción Saiz Otero do campus de Ourense ten aberto o prazo para solicitar unha das súas 41 prazas que para o curso 2020/2021. Á convocatoria poden presentarse membros da comunidade universitaria, que terán preferencia na concesión e condicións vantaxosas, pero tamén residentes e traballadores da cidade que non teñan vinculación coa institución académica. As solicitudes, tanto de renovación como de adxudicación de nova praza, poderán presentarse ata o día 25 de xuño de 2020 a través da sede electrónica da Universidade de Vigo. [+info](#).



O reitor negociará coa Xunta a posibilidade de desenvolver actividades nos campus desde o 7 de setembro

A UVIGO COMEZARÁ O VINDEIRO CURSO PREVISIBLEMENTE O 21 DE SETEMBRO CUNHA MODALIDADE DE DOCENCIA MIXTA E PRESENCIAL

M^a DEL CAMEN ECHEVARRÍA DUVI 13/06/2020

O inicio e o desenvolvemento do vindeiro curso 2020-2021 na Universidade de Vigo empeza a clarificarse despois dos acordos adoptados este venres nunha sesión extraordinaria de Consello de goberno, na que os seus membros aprobaron as *Medidas extraordinarias e urxentes para o desenvolvemento da organización docente no curso 20/21 en caso de crise sanitaria*, así como o calendario académico para o vindeiro curso, que fixa o inicio da actividade académica o 21 de setembro e a súa finalización o 11 de xuño de 2021. [+info](#).



Participantes neste proxecto de aprendizaxe-servizo

A RED ESPAÑOLA DE APRENDIZAJE-SERVIZO DESTACA UN PROXECTO DO CAMPUS ENTRE AS INICIATIVAS LEVADAS A CABO DURANTE A CRISE DA COVID-19

DUVI PONTEVEDRA 15/06/2020

A Red Española de Aprendizaje-Servicio (Redaps), unha asociación que ten como misión difundir e potenciar o uso dunha metodoloxía na que o alumnado pon en práctica os coñecementos adquiridos prestando un servizo nun contexto real, seleccionou e difundiu ao longo das últimas semanas unha serie de “iniciativas innovadoras” levadas a cabo por múltiples entidades, institucións e centros de ensino durante a crise da COVID-19. Entre elas, *QTeam. Mellora o teu campus*, un proxecto impulsado polo profesor da Facultade de Ciencias Sociais e da Comunicación Enrique . [+info](#).



UN HACKATHON PARA ADAPTAR O TECIDO EMPRESARIAL GALEGO A UNHA NOVA REALIDADE

DUVI 16/06/2020

Programadores, investigadores, deseñadores, estudantes, empresas... todos unidos na buscar solucións innovadoras para que o tecido empresarial galego afronte os retos provocados pola COVID-19. Así plantexa a Axencia Galega de Innovación o primeiro Hack-At-Home, un evento colaborativo virtual na procura de construír solucións tanto físicas como dixitais para afrontar os cambios derivados da crise sanitaria. O hackathon celebrarase entre o 27 e o 30 de xuño co apoio das universidades, as empresas tecnolóxicas e as persoas innovadoras que traballarán en equipos arredor de cinco retos da industria, o comercio e o emprego. [+info](#).



Maribel del Pozo, Francisco Eijo, Maruxa Cabeza, Chema García-Miguel, Claudia Domínguez, Ania Pérez e Juan Ramón Valiño

ESPECIALISTAS EN LINGUA DE SIGNOS ESPAÑOLA CREAN UNHA WEB QUE FACILITA O SEU ENSINO E INTERPRETACIÓN

D. BESADÍO DUVI 17/06/2020

Un equipo de especialistas da Facultade de Filoloxía e Tradución puxo en marcha este curso iSignos, unha nova ferramenta de consulta, aberta e gratuíta, na que se pon ao dispor de calquera persoa interesada un corpus de anotación da Lingua de Signos Española, coas súas correspondentes glosas identificativas. [+info](#).



Imaxe da presentación. Foto: Paula Justo.
Europa Press

O PROXECTO OCEANETS PRESENTA UN PROTOTIPO DE ROUPA DEPORTIVA FABRICADA CON FIBRAS TÉXTILES FROITO DA RECICLAXE DE APARELLOS DO MAR

DUVI 18/06/2020

En abril de 2019 púxose en marcha o proxecto internacional Oceanets, que ten entre os seus obxectivos “prever a perda de redes de pesca e avaliar a posibilidade de utilizar aparellos inservibles e outros residuos plásticos recuperados do mar para reciclalos e aproveitálos na produción de fibras téxtiles de alta calidade coas que fabricar produtos de interese para a industria téxtil”. Un ano despois, a iniciativa ten recollido 30 toneladas de refugallo de pesca e presenta o seu primeiro prototipo de roupa deportiva fabricada con este tipo de fibras téxtiles de reciclaxe. [+info](#).



Captura da conferencia

UN ACHEGAMENTO AOS RETOS DA DIXITALIZACIÓN DA ECONOMÍA DESPOIS DA PANDEMIA

DUVI OURENSE 18/06/2020

Este mércores pola tarde a delegación galega do Instituto Español de Analistas Financieros organizou de xeito virtual a través da plataforma Zoom a conferencia *Retos da economía galega na transformación dixital: que nos vai deparar a era pos-covid-19?*. Entre os participantes estiveron Santiago Lago, catedrático de Economía Aplicada da Universidade de Vigo, e Domingo Docampo, tamén catedrático da mesma institución académica na Área de Telecomunicacións. [+info](#).



O repositorio institucional contén máis de 1400 traballos científicos, na súa gran maioría teses

INVESTIGO, CATRO ANOS APOSTANDO POLA CIENCIA EN ABERTO

M. DEL RÍO DUVI 19/06/2020

O repositorio Investigo naceu en 2016 co obxectivo de reunir a produción científica da Universidade de Vigo nun espazo institucional de acceso aberto. Nel compílanse as teses, artigos de revistas, libros, comunicacións ou relatorios dos membros da comunidade universitaria que queren poñer a disposición do público o seu coñecemento. Poñendo en marcha esta ferramenta a UVigo uníase a un movemento que naceu a finais do século XX coa finalidade de que os resultados xerados pola investigación e publicados na literatura científica estivesen dispoñibles a través de internet sen barreiras de prezo e sen barreiras de consulta e uso por mor das restricións da regulación da propiedade intelectual. [+info](#).



A conselleira Carmen Pomar (Foto: Xunta)

SETE EXPERTOS EXTERNOS CONSTITÚEN O COMITÉ CIENTÍFICO QUE AVALIARÁ A ACREDITACIÓN DOS CAMPUS PARA A SÚA ESPECIALIZACIÓN ESTRATÉXICA

DUVI 22/06/2020

“É un procedemento único no conxunto do Estado co que se busca mellorar a dinámica de funcionamento futuro dos campus de especialización, impulsar o labor de investigación e mellorar a calidade da docencia, dotándoos dunha identidade propia e en estreita relación co potencial económico e as necesidades da súa contorna máis próxima”. Así se referiu hoxe a conselleira de Educación, Universidade e Formación Profesional, Carmen Pomar, ao proceso de constitución do comité de científico encargado de avaliar o proceso de acreditación dos campus de especialización. [+info.](#)

TELETRABAJO Y
CONCILIACIÓN CORRESPONSABLE
EN TIEMPOS DE COVID-19



Guía de buenas prácticas



Portada de guía.

UNHA GUÍA PARA FOMENTAR NO EIDO UNIVERSITARIO A CONCILIACIÓN NO TELETRABALLO

DUVI 22/06/2020

A Rede de Unidades de Igualdade de Xénero para a Excelencia Universitaria (RUIGEU), que reúne a 52 universidades españolas, entre elas a UVigo, acaba de publicar a guía de boas prácticas *Teletraballo e conciliación corresponsable en tempos de covid-19*. Con ela, a entidade aprema ás universidades españolas a apostar por esta corresponsabilidade ofrecendo recomendacións e medidas para previr desigualdades e asimetrías de xénero que, en opinión das entidades promotoras, estanse a agravar na actualidade. [+info.](#)



Fernando Dacosta, Olga Mojón, Anxo Lorenzo, Esther de Blas e Patricia Torres

A MOSTRA INTERNACIONAL DE TEATRO UNIVERSITARIO DE OURENSE VOLVE AOS ESCENARIOS PARA CELEBRAR 25 ANOS

DUVI OURENSE 25/06/2020

Do 2 ao 15 de xullo, a cidade de Ourense acollerá unha nova edición da *Mostra Internacional de Teatro Universitario de Ourense*, a Miteu. A cita cumprirá 25 anos celebrando a súa supervivencia a pesar do impacto da crise da covid-19 no sector cultural. A programación, adaptada ás esixencias sanitarias para garantir a seguridade do público asistente, contará con 17 representacións de compañías de cinco países e nela volverán a ter un protagonismo especial as aulas de teatro e danza do campus de Ourense. [+info.](#)



Desenvolverán fibras e revestimentos téxtiles biodegradables e biorreciclables para os aparellos e prendas

O GRUPO ECOTOX PARTICIPA NO PROXECTO EUROPEO GLAUKOS PARA REDUCIR A CONTAMINACIÓN XERADA POLA ROUPA E AS ARTES DE PESCA

M. DEL RÍO DUVI 25/06/2020

14 institucións de oito países traballan coordinadamente no proxecto europeo Glaukos que, no marco da convocatoria H2020, busca solucións circulares para a industria téxtil. O grupo de Ecotoxicoloxía e Contaminación Mariña, Ecotox, do Centro de Investigación Mariña da UVigo, é o único representante español nesta iniciativa que ten como obxectivo desenvolver fibras e revestimentos téxtiles biodegradables e biorreciclables para as artes de pesca e a roupa. [+info](#).

10



Celebrarase entre o 1 e o 3 de xullo cun récord de participantes, 250 persoas

O CONGRESO INTERNACIONAL DE AGROECOLOXÍA SERÁ O PRIMEIRO SIMPOSIO EN LIÑA DENTRO DO CAMPUS REMOTO

M. DEL RÍO DUVI 26/06/2020

O Congreso Internacional de Agroecoloxía, que ía ter lugar na Facultade de Ciencias Económicas e Empresariais a vindeira semana, converterase no primeiro que se desenvolva de xeito virtual no Campus Remoto da UVigo. Organizado polo grupo de investigación en Economía Ecolóxica, Agroecoloxía e Historia, esta oitava edición do simposio tivo que facer fronte á nova situación derivada da pandemia da covid-19 e optouse por continuar co evento, pero en modalidade en liña, e ampliar un día o programa. Así o congreso arrancará un día antes do previsto inicialmente, o día 1 de xullo e estenderase ata o día 3 de xullo. [+info](#).

UNIVERSIDADE DE VIGO

Unidade de Análisis e Programas.

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640